

Siasat, elak jadi munafik

Perbuatan menyebarluaskan maklumat palsu boleh meletakkan seseorang individu Islam menjadi munafik.

Sehubungan itu, Pensyarah Kanan Fakulti Ekologi Manusia, Universiti Putra Malaysia (UPM), Dr Mohammad Nidzam Abdul Kadir meminta masyarakat mengamalkan prinsip ‘taabiyun’ atau membuat siasatan terlebih dulu terhadap maklumat yang diterima sebelum ia disebarluaskan.

Dalam Islam, beliau berkata, al-Quran sememangnya meletakkan satu prinsip atau asas untuk menapis maklumat sekiranya ia disampaikan oleh seorang yang fasik.

“Jika kita tahu seseorang itu suka menipu, tidak jujur, maka prinsip melakukan tabayyun atau membuat semakan itu penting.

Semak maklumat terlebih dahulu

“Ia tidak hanya terpakai kepada seorang yang fasik saja, sebaliknya untuk semua agar kita melakukan semakan terlebih dulu sesuatu maklumat yang diterima.

“Ada kemungkinan seseorang itu tersalah menyampaikan berita yang tidak betul dan tidak berniat untuk menipu,” katanya.

Mohammad Nidzam berkata, prinsip tabayyun juga penting demi menjaga aib dan keburukan seseorang.

Katanya, walaupun maklumat itu dirasakan benar, ia tetap tidak dibenarkan dalam agama sekiranya apa yang disebarluaskan boleh menjatuhkan maruah dan air muka seseorang.